



LEFAPHA  
LA BODIREDIPUSO LE TSAMAIISO  
REPHABOLIKI YA AFORIKABORWA

Ditshwaelo ka:

**Motlotlegi Moh. Noxolo Kiviet, MP**  
**Tona ya Bodiredipuso le**  
**Tsamaiso**  
**Kwa**

**Kopanong le Baagi kwa Middelburg, kwa Porofenseng ya Kapa Botlhaba**  
**ka la 10 Phatwe 2023**

## LENANE LA MELAO LE DITUMEDISO

1. Boeteledipele jwa Porofense
2. Boeteledipele jwa Kgaolo
3. Meiyara le Makhanselara
4. Badirisani ba bangwe ba tlhabololo
5. Batsamaisi ba bagolo ba ba leng teng
6. Bomme le Borre

### **Dumelang!**

Ke ka tlotlo go ema fa pele ga lona gompiano fa mo Mmasepaleng o montle o o bidiwang Inxuba Yethemba wa porofense ya Kapa Botlhaba, jaaka re kokoanela tiragalo e ya puisano le baagi. Kokoano e ke kgolagano ya maitlamo a rona a go buisana ka matlhagatlhaga le baagi go samagana le merero ya thebolo ya ditirelo ka Mmotlolo wa Tlhabololo wa Kgaolo (DDM) le lenaane la go "Isa Puso kwa Bathong".

Lenaane la Mmotlolo wa Tlhabololo wa Kgaolo (DDM) le re neetse serala se se botlhokwa sa go buisana ka tlhamalalo le baagi le baamegi ba tshwana le lona. Le re letleletse go tlhaloganya ditlhokwa tsa lona, go reetsa matshwenyego a lona, le go dirisanammogo go bona ditharabololo tsa dikgwetlho tse le lebaganeng le tsona. Re ne ra etela mafelo a ditirelo a puso, ra tshwara ditherisano, e bile ra dira diketelo tse di itsisetsweng le tse di sa itsisewang go netefatsa gore re na le kutlwisiso e e feletseng ya thebolo ya ditirelo mo mafelong a lona.

Gompieno, ke batla go tlhagisa botlhokwa jwa maiteko a rona a a kopantsweng mabapi le go maatlafatsa lenaane la Mmotlolo wa Tlhabololo wa Kgaolo (DDM) le dikgato tsa go buisana le setšhaba.

Puisano e e dira jaaka setlapele sa Imbizo ya Moporesidente e e tlang, e e rulaganyeditsweng go diragala kwa Kgaolong ya Chris Hani ka Phatwe ka la 11, 2023.

Imbizo e e eteletsweng pele ke Moporesidente Cyril Ramaphosa, e ikaelela go tokafatsa kutlwisiso ya Mmotlolo wa Tlhabololo wa Kgaolo le go bebofatsa thebolo ya ditirelo tse di leng botlhokwa go batho.

Ke tiro ya rona ya botlhe go tokafatsa kgolagano le tirisanommogo magareng ga mafapha a puso, dimmasepala, le mekgatlho ya baagi. Ka maiteko a tirisanommogo, re ka netefatsa gore mafapha otlhe a tlamelwa sentle go samagana le ditlhokwa tsa baagi ba rona. Go samagana le dikgwetlho tsa thebolo ya ditirelo sentle, re tshwanetse go tokafatsa bokgoni jwa puso go neelana ka ditirelo tse di leng maleba. Se se akaretsa go tokafatsa dithulaganyo tsa rona, mekgwa, le ditsamaiso, mmogo le go obamela melao ya Batho Pele. Re tshwanetse go tokafatsa ditiro, go sekaseka go dira gangwe le gape, le go salamorago maemo a a kwa godimo a thebolo ya ditirelo.

Dikamano tsa magareng ga mafapha di botlhokwa mabapi le go salamorago tirisanommogo go kgabaganya dikarolo tse tharo tsa puso. Re tshwanetse go tswelapele go rotloetsa dikamano tse di popota le go netefatsa tlhaeletsano e e maatla. Mokgwa wa phaposi ya thulaganyo o ka nna sedirisiwa se se maatla mabapi le go fitlhelela tirisanommogo e.

Go ya pele, re tshwanetse go beeletsa mo go kgoneng le mo bokgoning jwa badiredipuso ba rona. Se se akaretsa go tlamela ka didirisiwa tse di leng maleba, ka katiso e e tswelapele, le go tlhola maemo a a siameng a lefelo la tiro. ka go dira jalo, re ka kgona go ba thusa go rebola ditirelo ka bokgoni le ka maatla.

Boitlhamelo le bokgoni di botlhokwa mabapi le go rarabolola dikgwetlho le go bona ditharabololo tse di siameng. Re tshwanetse go rotloetsa le go emanokeng mekgwa ya boitlhamelo mabapi le thebolo ya ditirelo.

A re amogeleng dikakanyo tse dintšhwa le dithekenoloji tse di tokafatsang boleng le phitlhelelo ya ditirelo tsa puso.

Gape go botlhokwa go fokotsa go bega go lapa kwa dikarolong tse di leng kwa tlase le go tlamela ka ditekanyetsokabo tse di lekaneng mabapi le thebolo ya ditirelo ya motheo. Re tshwanetse go netefatsa gore didirisiwa tsa rona di abiwa sentle le ka bokgoni go fitlhelela ditlhokwa tsa baagi ba rona. Kwa bokhutlong, ke batla go le netefaletsa gore re itlamile go salamorago tlhaeletsano ya gangwe le gape le baagi. Mantswe a lona a botlhokwa, e bile re fa go reetsa. Re ya go tswelelopele go lebelela mafelo a a neng a etelwa ka lenaane la Mmotlolo wa Tlhabololo wa Kgaolo (DDM) le go samagana le merero e e tlhagisitsweng. Karabo e ya go neelwa, e bile tswelelopele e ya go abelanwa le lona.

Tokafatso ya thebolo ya ditirelo e bothokwa go netefatsa botshelo jo bo botoka go batho ba rona botlhe. Lenaane la Mmotlolo wa Tlhabololo wa Kgaolo (DDM) le na le seabe se se leng botlhokwa mabapi le go sekaseka maemo a thebolo ya ditirelo le go buisana le baagi go tokafatsa ditirelo.

Le fa gontse jalo, re ka se kgone go dira re le nosi. Re tlhoka maitlamo a boeteledipele jwa mafapha, tirisanommogo ya magareng ga mafapha le ya magareng ga puso, go bega gangwe le gape, go tlamela ka didirisiwa go go leng maleba, le badiredipuso ba ba nang le bokgoni. A re dirisanengmmogo jaaka badirisani mo tswelelongpele, re tshwaragane mo maikaelelong a rona a go rebola ditirelo tsa boleng go sekhutlhwana sengwe le sengwe sa naga. Seabe sa rona le kemonokeng di botlhokwa mo loetong lwa rona le le mabapi le bokamoso jo bo botoka.

Bomme le borre, baeng ba ba tlotlegang, le barotloetsi ba tekatekano ya bong, puisano ya rona gompiano gape e diragala letsatsi morago ga Letsatsi la Basadi e bile re tswelelopele go keteka Kgwedi ya Basadi.

A re gakologelweng gore tekatekano ya bong ga se morero wa basadi; ke morero wa ditshwanelo tsa botho o o batlang seabe sa matlhagatlhaga le tirisanommogo ya batho botlhe, go sa kgathalesege bong.

A gape ke tseyeng tšhono e go atolosa dikakgolo tsa me tse di bothitho go setlhopha sa Banyana Banyana se se gakgamatsang mabapi le diphitlhelelo tsa sona tsa maemo a a kwa godimo mo

kgaisanong ya sešeng. Boineelo jwa bona, bokgoni jwa bona, le mowa wa bona o o tsepameng di tlišitse motlotlo o mogolo mo nageng ya rona.

Ke a leboga, e bile a re tšwelelengpele go maatlafatsa tšhwaragano ya rona ka re tsena mo tseleng e e e leng botlhokwa ya phetogo le maatlametlo a thebolo ya ditirelo.

Ke a leboga!